

Uunga siunnersuut: Inatsisartut inatsisaat siusinaartumik pensionisiaqartitsisarneq pillugu Inatsisartut inatsisaata allangortinneqarnera pillugu

(Isumaginninnermut, Suliffeqarnermut Nunamullu Namminermut Naalakkersuisoq)

Saqqummiussinnermut allakkiaq

(Isumaginninnermut, Suliffeqarnermut Nunamullu Namminermut Naalakkersuisoq)

Siullermeerneqarnera

Matumuuna Naalakkersuisut saqqummiuppaat siusinaartumik pensionisiaqartitsisarneq pillugu Inatsisartut inatsisaata allangortinneqarnissaa pillugu siunnersuut.

Inatsisartut upernaakkut ataatsimiinnermi 2022 akuersissutigaaq Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allangortinneqarnerat pillugu Inatsisartut inatsisaat. Taamaasilluni siusinaartumik pensionisiaqartup pensionisiassanik qaffasinnerpaanik pisartagaqartup isertitarisinnaasai pensionisiassanit ilanngaassisoqartalinninnerani qaffanneqassapput ukiumut 28.000 kr.-iniit 38.000 kr.-inut.

Kaajallaasitalli maanna atuuttuusup isumaginninnikkut aningaasannorlugit akilerneqartartut pillugit nutarterlugu malinnaatinneqarneranut atatillugu paasineqarpoq naatsorsuinerlugit pissusissamisuunngitsoqartoq.

Siunnersuutip matuma tamanna iluarsivigissavaa siusinaartumik pensionisiaqartunut tamanut aningaasat akileraarutaasussaannngitsut 28.000 kr.-iniit 38.000 kr.-inut qaffanneqarnerisigut.

Tamatumunnga atatillugu siunnersuutip iluaqusissavai innuttaasut appasinnerpaanik imaluunniit akullernik siusinaartumik pensionisiaqartunut akilerneqartartut, naligiissilerlugillu siusinaartumik pensionisiaqartunut qaffasinnerpaanik akilerneqartartunut.

Taamatut oqaaseqarlunga siunnersuut Inatsisartunut oqaluuserisassannortippara.